

Uskoro biometrijsko skeniranje lica na aerodromima u EU



Odmah po slijetanju na velike aerodrome putnici će, ako to prihvate, biti podvrgnuti biometrijskom skeniranju i bit će im uzeti otisci prstiju, navodi "EU-Observer".

Biometrijska mreža za prikupljanje podataka dio je "pilot programa" pod nazivom "pametne granice".

Putnici će u početku moći da odbiju davanje podataka, ali će nakon završetka faze testiranja u septembru - skeniranje biti

obavezno.

Među aerodromima u kojima će biti prikupljeni podaci su aerodromi u Švedskoj, Francuskoj, Portugalu, Španiji i Holandiji.

EU namjerava da uvede biometrijsko skeniranje za putni, željeznički i morski saobraćaj, a zajedno s biometrijom lica putnicima će biti skenirana i dužica oka.

(Izvor: www.ekapija.ba)

Nove odredbe za građane EU u inostranstvu

Od nedavno građani EU više ne trebaju strahovati zbog eventualnog nedostatka vlastitih ambasada - nove odredbe im idu u korist. Statistika bilježi godišnje oko 90 miliona putovanja izvan granica Unije. Važno je i napomenuti da otprilike 30 miliona službenih građana Evropske unije živi izvan nje. Ova činjenica bila je povod nove odredbe koju je donijela Komisija EU kako bi zaštitila svoje građane.

Nove mjere odnose se na sve građane koji ili putuju ili žive izvan EU, a njihova matična zemlja nema nikakvo predstavništvo ni ambasadu u dotičnoj destinaciji. Samo u Americi, Kini i Rusiji postoje službena predstavništva apsolutno svih 27 zemalja Evropske unije. U svim drugim zemljama uspostavljanje

kontakata s domovinom je dosta komplicirano i zahtjeva posrednika, to jest, prvo se kontaktira matična zemlja koja potom povezuje svog građana s dotičnom stranom zemljom.

Ovaj problem je riješen dodjeljivanjem posebnih prava EU građanima, koji naime sada mogu koristiti ambasade ostalih zemalja po potpuno istim uslovima kao i oni koji iz te zemlje potječu. Tipične situacije u kojima EU građanin treba pomoć svoje zemlje su: krađa ili gubitak pasoša, nesreća te oboljenje težeg tipa, agresija odnosno nasilni napad, hapšenje ili pritvor, hitna pomoć u slučaju prirodnih katastrofa, građanski nemiri ili eventualni oružani sukob, te smrtni slučajevi u inostranstvu.

(Izvor: www.magazinplus.eu)

Hrvatska: Polovica ispitanika želi manje učenja napamet, a više kreativnosti

U januaru ove godine započeli su pregovori o reformi školstva. Moguće novosti su obavezna devetogodišnja osnovna škola, potpuno novi način usvajanja znanja s više kritičkog i logičkog

razmišljanja, autonomija nastavnika u kreiranju nastavnog časa te promjene u ocjenjivanju u kojem će, osim brožanih od 1 do 5, biti i opisnih ocjena.

Portal **EduCentar** istražio je na više od 320 ispitanika koje su najveće boljke starog sistema obrazovanja, odnosno što bi prvenstveno i obavezno promijenili.

Malo manje od polovice ispitanika (46%) ističe da je najveća mana starog sistema previše učenja napamet bez poticanja kreativnog razmišljanja.

"Današnja djeca se sve manje snalaze u realnim situacijama. Svrha školovanja, pogotovo srednjoškolskog i fakultetskog bi morala biti snalaženja u svakodnevnim poslovnim aktivnostima i brzim uključivanjem na tržište rada bez gubitka za poslodavce", objašnjava jedan od ispitanika, a drugi se nadovezuje da 'nedostaje sloboda izražavanja i razmišljanje van okvira'.

Trećina ispitanika (30%) tvrdi da je glavni problem previše gradiva koje nije primjenjivo u praksi. Ispitanici komentiraju da se 'fokusiranjem na nebitne informacije gubi fokus s onih bitnih za život.'

Nedostatak praktičnog rada tokom školovanja ističe petina ispitanika (20%).



"Danas sve manje ljudi može učiniti nešto svojim rukama, a obrazovanje zanatlija se ne vrednuje te iz zanatskih škola izlaze ljudi bez ljubavi prema poslu za koji su se školovali, te s manjkom volje za usavršavanjem i razvijanjem kreativnosti", komentar je jednog od ispitanika.

Ispitanici su također svjesni da zbog nedostatka praktičnih vještina teško pronalaze posao: "Postoje škole za koje posao uopće ne postoji jer je program nastave loše strukturiran."

Svega 4% ispitanika bi prvenstveno mijenjalo sistem ocjenjivanja. "Problem nije u ocjenama nego u subjektivnom načinu ocjenjivanja", komentariše jedan od ispitanika.

(Izvor: www.europa.eu)

Treninzi u okviru programa Erasmus+

U okviru Erasmus+ programa nastavljaju se organizovati međunarodni treninzi. Trening pod nazivom " Obrazovanje i sport za sve" održat će se u Italiji (Sassari) od 1. do 5. oktobra 2015. Osim njega još jedan trening održat će se u Italiji (Olbia) i to od 8. do 16. septembra 2015. a pod nazivom " Inkluzivne metode u stranim jezicima".



Još jedan zanimljiv trening " Od ideje do projekta" održat će se u Portugalu od 26. do 31.jula.

Navedeni treninzi imaju za cilj osvijestiti važnost unapređenja cjelokupne kvalitete obrazovanja vaše škole ili druge edukacijske organizacije.

Rok za prijavu na sve treninge je 4.mart 2015. (do 12 sati po srednjoevropskom vremenu). Za navedene treninge postoji mogućnost finansiranja kao aktivnost KA1 (mobilnost u svrhu učenja). Ukoliko su vam potrebne dodatne informacije ili pojašnjenja slobodno kontaktirajte na e-mail info@minevaganti.org

(Izvor: www.dw.de)

Besplatna aplikacija za naučiti kako pisati EU projekte

Organizacija za građanske inicijative u okviru projekta „Omogućimo to putem EU fondova“ razvila je aplikaciju za elektronsko učenje pisanja i provođenje projekata finansiranih sredstvima Evropske unije.

Prvi od ukupno 6 modula je dostupan svima onima koji žele naučiti više o ukupnom funkcionisanju EU fondova te

načinima izrade i provođenja projekata na web sjedištu projekta. Tema prvog modula su programi koje Republika Hrvatska koristi od 1996. godine do danas, tipovi finansiranja, te konkursna dokumentacija. Ostali moduli će biti objavljeni na web sjedištu projekta svakih 5 do 6 dana, za što ćete također biti pravovremeno obaviješteni.

Sve upute za praćenje sadržaja kao i za polaganje kratkog kviza znanja koji se nalazi na kraju svakog modula se nalaze unutar same interaktivne aplikacije. Uz postojeću Virtualnu učionicu pisanja EU projekata Evropskog edukacijskog foruma finansiranu u sklopu istog programa, ova besplatna online edukacija Organizacije za građanske inicijative predstavlja jednu pozamašnu količinu online, besplatnih i svima dostupnih informacija o tome kako pretočiti svoju ideju u projekt te dobiti potrebno finansiranje iz fondova EU za njeno ostvarenje! Naučite kako ostvariti i svoju ideju!

Da li znate koja je država članica Evropske unije najmanja, a koja najveća?

Najmanja država članica s površinom od 316 kvadratnih kilometara je Malta.

Slijede Luksemburg sa 2586 kilometara kvadratnih i Kipar sa 9250 kvadratnih kilometara.



S druge strane, površinski najveća država Evropske unije je Francuska s 550 hiljada kilometara kvadratnih. Slijede Španija 504 782 kvadratna kilometra i Švedska sa 449 964 kvadratna kilometra.

(Izvor: www.radiosarajevo.ba)

Kolika je minimalna plata u zemljama EU-a?

Hrvatska spada u skupinu zemalja članica s najnižom minimalnom platom (372 eura) dok je minimalna bruto plata u Luksemburgu 1874 eura.

Evropska gospodarstva se međusobno jako razlikuju, a paralelno s tim, variraju i minimalne plate u svakoj od država, ali i troškovi života.

Infografika prikazuje podatke Eurostata o minimalnoj plaći u 2013. godini u zemljama EU-a te u nekima koje nisu članice Unije.


Najveću minimalnu platu u EU-u ima Luksemburg, 1874 eura, dok Rumunjska ima gotovo 12 puta manju; tek 157,5 eura. Šest zemalja članica ima minimalnu platu veću od 1000 eura, dok ih

10 ima ispod 400 eura. Minimalne plate su izražene u bruto iznosima.

Hrvatska spada u skupinu zemalja članica s najnižom minimalnom platom. Ona iznosi

372 eura, dok, primjerice, Slovenci imaju 784 eura, a oni najviše pogođeni krizom, Grci, 684 eura.

Minimalne plate su u pravilu određene zakonom. Međutim, u



nekim slučajevima su utvrđene kolektivnim ugovorima. Taj iznos nije nužno ažurirati svake godine niti prilagodba uvijek rezultira povećanjem plata. Valja naglasiti da ne postoji precizan način da se usporede plate. Paritet kupovne moći ispravlja razlike u prosječnim troškovima života između zemalja, ali ne uzima u obzir moguće varijacije u cijenama između gradova unutar iste zemlje ili neke druge čimbenike, poput broja djece u kućanstvima ili troškova školovanja.

Tako Danska, Finska, Italija, Austrija i Švedska nemaju minimalnu platu na nacionalnoj osnovi, ali ipak imaju minimalne stope utvrđene kolektivnim ugovorima koji zajedno pokrivaju visok udio radno sposobnog stanovništva.

I u Francuskoj postoje vrlo politizirani sindikati koji su se izborili da primanja slabo plaćenih radnika budu na razumnijem nivou. Njihov smisao za kolektivno pregovaranje dijelom proizlazi iz njihova

sveprisutnog utjecaja u francuskom društvu. No uprkos snazi sindikata u Francuskoj i drugdje, sve je manje sindikalnih članova diljem Zapadne Europe. Razlog tome je što je teška industrija u stalnom padu u Evropi i većinom je preseljena na azijski kontinent.

U poređenju sa Zapadnom Evropom, istočnoevropske zemlje članice imaju izrazito nisku minimalnu platu.

Nakon Njemačke, koja je odlučila uvesti minimalnu platu od 1. januara 2015, švicarski građani će o tome odlučivati 18. maja. Minimalna plata u Švicarskoj bi, ako građani odluče tako, bila četiri hiljade franaka, odnosno 3281 euro i kao takva bi bila najveća u svijetu, a ne samo na evropskom kontinentu.

(Izvor: www.tportal.hr)